

FAAFAIAOGA

T U S I T A I A L A

FAAFAIAOGA

T U S I T A I A L A

Lolomiina e le  
Ekalesia a Iesu Keriso o le Au Paia o Aso e Gata Ai

© 1994, 1999, 2001 e le Intellectual Reserve, Inc.  
Ua taofia aia tatau uma  
Lomia i le Iunaite Setete o Amerika  
Faamaonia le faa-Peretania: 3/01  
Faamaonia le faaliliuina: 3/01  
Faaliliuina o le *Teaching Guidebook*  
Samoan

# Faasino Mataupu

---

Faatomuaga	1
Ia Saunia Oe Lava Faaleagaga	2
Ia Aoa Atu e Faapei ona Aoa Atu Iesu	4
Ia Faaaoga Metotia Faafaiaoga Eseeese	9
Ia Saunia Au Lesona	13
Ia Malamalama i Tagata o Loo E Aoaoina	16
Tau i o le Aoa Atu	18
Taulimaina o le Faaleleia Atili o Faiaoga i le Paranesi	19
Oototoga mo le Vasega o le Aoaoina Atu o le Talalelei	21
O Le Mauaina mai o Tusi ma Isi mea mo Aoaoga Faale-Ekalesia ma le Sailia o Faamatalaga e Uiga i le Talafaasolopito Faaleaiga	23

---

## Tufatufaina Atu

O le *Tusitaiala Faafaiaoga* e faaoga faatasi ma tusi faavae o mataupu e aoaoina ma o le a tele foi lona aoga mo faiaoga ma isi tagata i iunite o loo faaogaina mataupu aoaoina lautele (tagai *Faatonuga mo Taitai o le Perisitua ma Ausilali e Uiga i Mataupu Aoaoina* [36363]). E mafai ona fesoasoani leni tusitaiala i tagata e faaleleia atili ai le faiga o aoaoga i totonu o le aiga ma faalapotopotoga a le Ekalesia. E tatau ona tofu le faiaoga ma se kopi; e mafai foi ona fesoasoani i ulu o aiga taitasi.

# Faatomuaga

---

Ua fuafuaina lenei tusitaijala mo matua, o ta'ita'i, ma faiaoga. E mafai ona faa-aoga o se vaega o taumafaiga a tagata taitoatasi e faaleleia atili ai le avea ma se faiaoga. E mafai ona faa-aoga [lenei tusitaijala] o se faavae mo le kosi po o le vasega o le Aoaoina Atu o le Talalelei ma fonotaga mo le faaleleia atili o faiaoga (tagai itulau 21–22).

Na aoao mai le Alii:

“Ou te tuuina atu foi ia te outou le poloaiga ia outou aoao le tasi i le tasi i mataupu o le malo.

“Ia outou a’oa’o atu ma le filifiliga ma o lo’u alofa tunoa o le a mafuta ma outou, ina ia a’oa’oina atoatoa lelei outou i teori, mataupu autu, mataupu faavae, i le tulafono o le talalelei, ma mea uma lava tau le malo o le Atua, e tatau mo outou ona malamalama ai” (MFF 88:77–78).



O le aiga e ao ona avea ma nofoaga tutotonu e faia ai lenei mea. E lagolago ina le aiga i mea o loo aoao atu ma aoaoina mai i le lotu. Ua ia te i tatou uma ni matafaioi o ni faiaoga i nei nofoaga [aiga ma le lotu] faatasi ai ma o tatou tuaoi ma paaga i aso taitasi. Tatou te

aoao atu o ni matua, atalii, afafine, tane, ava, uso ma tuafafine. Tatou te aoao atu o ni taitai o le Ekalesia, o faiaoga i potuaoga, o faiaoga o aiga, ma faiaoga asi-asi. Tatou te aoao atu foi o ni paaga i fale faigaluega, o tuaoi, ma uo. O nisi taimi tatou te aoao atu i mea tatou te tautala ai ma molimau tatou te tuuina atu, peitai e sili atu ona faalausosoo ona tatou aoao atu i faaitaiga.

I matafaga o le Sami o Kalilaia, na aoaoina ai Peteru e le Alii toetu, “Ia e fafaga i a’u mamoe” (Ioane 21:16–17). O le valaauga e aoao atu, e manaomia ai lo tatou tausua po o le fafagaina o agaga o isi i upumoni o le talalelei ma taitai atu ai i latou i le Faaola (tagai Moronae 6:4). Mafaufau i le tiute o le aoaoina atu o le talalelei mo le faaolataga o le fanau a le Tama Faalelagi. Pe mafai ona e manatu i se isi tiute e sili atu ona mamalu pe pa’ia?

Afai o oe o se matua, po o se faiaoga faatoa valaauina, atonu e sili atu lou popole i lenei tiutetauave. Ia manatua, o loo sauni le Alii e fesoaosani atu ia te oe. Ua uma ona folafola mai e Ia afai tatou te lotomauualalo ma faatuatua, o le a “faia [e Ia] o mea vaivai ma mea malolosi ia te i [tatou]” (Eteru 12:27). I a tatou taumafaiga e faaleleia le avea ai ma faiaoga, e mafai ona tatou galuea’iina le poto masani ua tatou maua faatasi ai ma tomai ua tatou atina’eina i o tatou olaga. O le a faatuputeleina o tatou tomai pe a tatou saunia ma le faaeteete, ia taumafai e faamalosi ia i latou o loo tatou aoaoina, ma ia faalagolago i le Alii.

# Ia Saunia Oe Lava Faaleagaga

---



A o e saunia oe lava faaleagaga, o le a taialaina oe e le Agaga, po o le Agaga Paia, ma fesoasoani ia te oe i lou aoao atu. E tatau ona i ai le Agaga Paia e aoao atu ai mataupu faavae ma upumoni o le talalelei. Ua fetalai mai le Alii, “O le a tuuina atu foi le Agaga ia te outou i le tatalo i le faatuatua; ae faai tou te lē maua le Agaga aua tou te a’o-a’o atu” (MFF 42:14). O le a fesoasoani nei fautuaga ia te oe e te saunia ai e aoao atu faatasi ai ma le taitaiga a le Agaga Paia.

## Ia Faamanuia i se Tofiga

Pe a valaauina oe e te aoao atu, e tatau ona faamanuia oe i le tofiga ma tuuina atu se faamanuiaga faapitua e ou taitai perisitua. O le a fesoasoani lenei faamanuiaga e faataunuuna ai lou valaauga. Pe a e faia mea uma e te mafaia e au-auna atu ai i lou valaauga e aoao atu,

o le a faalauteleina e le Alii ou agavaa e faatosina mai ai isi mo le lelei. O le a Ia faapoopo atu ia te oe tomai e sili atu i lo au lava taleni ma tomai pe a tatau ai.



## Saili atu mo le Taitaiga a le Agaga Paia


Saili atu i le Agaga Paia pe a e aoao atu. E mafai ona fesoasoani o Ia ia te oe ina ia e malamalama i mea e manaomia e i latou e te aoaoina atu, ma saunia ai lesonea e taulimaina ai na manaoga. O le a Ia faamaluluina loto ma saunia mafaufau mo le mauaina o musumu-suga faapoopo ma taitaiga.

## Ia Tatalo e Le Aunoa

Ia tatalo e le aunoa ma fesili atu i le Alii e faamanuia oe a o e suesue ma sauniuni. I nisi taimi e mafai ona e faapoopo i ai ma le anapogi i au tatalo. Tatalo ina ia e malamalama ma alofa i tagata taitoatasi o loo e aoaoina. Aoao ia e iloa ma mulimuli i uunaiga a le Agaga Paia o le a oo mai ia te oe.

## Suesue i Tusitusiga Paia

Ia suesue ma le agaga tatalo i tusitusiga paia. A e faia lena, o le a e aoao e uiga i le Faaola ma tuputupu a'e ai i le malamalama o le upumoni. O le a fesoasoani le Agaga Paia ia te oe ia malamalama i mau ma iloa ai le aualea e faaaoaga ai i mea o loo manaomia e le vasega ma tagata o le aiga. O le faaopoopo atu o le tatalo ma le anapogi i lau suesuega o tusitusiga paia, o le a faamalosa ai oe ma taitaiina e le Agaga Paia lou aoao atu.



## Ola i le Talalelei

Ia ola i aoaoga o le talalelei i le atoatoa e te mafai. Ia salamo mai agasala ua tuana'i. Pe a e faia nei mea, o le a e mauaina le malosi ma le malamalama. O le filemu ma le fiafia e te lagonaina mai le taumafai e ola i le talalelei o le a iloagofie e isi. O le a latou lagonaina le faamaoni o lau molimau ma le mana o lou naunautai. O le a aoaoina i latou i au faataitaiga i lou olaga.

Sa faigata i se tasi faiaoga ona ia lagonaina le taitaiga a le Agaga Paia a o ia saunia lana lesona. A o tatalo o ia mo se fesoasoani, sa ia iloa ina o loo ita lona loto i sona tuaoi sa agaleaga ia te ia. Sa ia ole atu ma le lotomaulalo i le Alii e faamagalo o ia. Na ia asiasi atu i lona tuaoi i le aso na sosoo ai, ma faatoese i ai ona o lona ita ia te ia. Sa ia faia faalelei lona tuaoi, ma sa mafai ai ona toe fiafia i le taitaiga a le Agaga Paia.

## Ia Lotomaulalo

E mafai ona fesoasoani le lotomaulalo ia te oe e aloese mai ai i tofotofoga e taula'i atu ia te oe lava ia pe faalagolago tele foi i lou lava atamai po o taleni. E mafai ona e faaalua le lotomaulalo i le mulimuli i le apoapoiga o loo i le Faataoto 3:5-6: "Ia e faatuatua ia Ieova ma lou loto atoa; a e aua le faalagolago i lou lava atamai. Ia e manatua o ia i ou ala uma, ona faatonuina ai lea e ia lava ou ala." Ua aoao mai le Alii, "Ia e loto maualalo; ona ta'ita'iina ai lea o oe e le Alii lou Atua, ma tali atu i au talosaga" (MFF 112:10).

# Ia Aoa atu E Faapei Ona Aoa Atu Iesu

---



## Ia E Alofa Ia I Latou o Loo E Aoaoina

A o soifua le Faaola i le fogaeleele, sa Ia faaalua lona alofa tele ma le malamalama i tagata uma. Na ia aoaoina ē matitiva, o ē mauoa, o ē ua tuulafoaiina, ma ē agasala. Na ia aoaoina i tatou ia alolofa i tagata uma ma fesoasoani le tasi i le isi. Na ia fetalai mai, “O le poloaiga fou ou te tuu atu ai ia te outou, ia outou fealofani; faapei ona ou alofa atu ia te outou, ia fealofani foi outou” (Ioane 13:34). Pe a tatou faaali atu lo tatou alolofa i e o loo tatou aoaoina, ona tupu tele ai lea o lo latou iloaina o lo latou taua e faavavau, sili atu le naunau e aoa, ma naunau atili e talia le Agaga.

O le avea ai ma se faiaoga o le talalelei, e sili atu i le na ona tuuina atu o se lesona i vaiaso taitasi. O le isi foi ona

uiga, o le manatu alofa lea i tagata o lau vasega. Ia faia se taumafaiga e iloa ai i latou uma taitoatasi. O le a fesoasoani lena e atili lelei ai lou aoaoina o i latou. Atonu latou te manaomia lau fesoasoani pe i ai ni o latou faafitauli, pe a le o mai, pe i ai foi ni o latou tulaga lē atoatoa o le malosi. Manatua le faataotoa a le Faaola i le mamoe e tasi na leiloa (tagai Luka 15:3– 6).





O se tasi faiaoga o se tamaitiiti e seāseā sau i le vasega, na ia iloina o taimi uma lava na te faafesoota'ia ai le aiga o le tamaitiiti i le vaiaso, e sau ai lava le tamaitiiti i le Aso Sa e sosoo ai. Na ia taumafai e talanoa soo i matua o le tamaitiiti ma ta'u atu i ai lona alofa mo le la tama. E oo lava foi ina alu o ia e aumai le tamaitiiti mai le aoga pe a faigaluega ona matua, ina ia aua ai ne'i misia e le tamaitiiti se gaioiga a le vasega.

I le avea ai o se faiaoga, e mafai ona e faaaumeaina mai tagata ma fesoasoani ina ia tumau ai i le talalelei. E taua tele lenei mea mo tagata fou faatoa liliu mai. Ia fesoasoani pea lava pea ina ia latou maua le lagona fiafia e auai mai. Vaavaai ni avanoa mo i latou e auai ai i le faatinoina o le vasega. Ia saunia oe lava e aoao atu i le Agaga ma le alofa ia upumoni o le talalelei.

## **Aoao Atu Upumoni o le Talalelei**

Na aoao mai e le Faaola upumoni o le talalelei. Na ia faamamafaina uluai mataupu faavae ma sauniga—o le faatuatua, salamo, papatisoga, ma le mauaina o le Agaga Paia. Na ia aoao mai i tatou ia alolofa ma auauna le tasi i le isi. Na ia aoao mai e uiga i le perisitua, o feagaiga ma sauniga, ma mea uma e tatau ona tatou iloa, faia, ma ituaiga tagata e tatau ona tatou i ai, ina ia tatou o atu ai ia te Ia. E ao foi ona tatou aoao atu le talalelei e pei ona faaalua mai i tusitusiga paia ma afioga tulei a perofeta o aso e gata ai. O mataupu faalalolagi, o manatu faaletagata lava ia, ma aoaoga taumatemate pe feteenai foi e lē talafeagai.

Na faigofie lava ona aoao mai e le Faaola ia upumoni. Na ia faaaogaina gagana, o tala, ma faataitaiga o aso fai pea, e manino ma malamalama gofie. O ana lesona na aofia ai aafiaga masani e tele ina ia malamalama ai tagata. Na ia ta'ua le sailia o se mamoe ua leiloa, sailia o se tupe na leiloa, ma le olioli ina ua toe foi mai se atalii na sē (tagai Luka 15).

E masani ona faaaoga e le Faaola mau pe a Ia aoao atu. Ia e ta'ita'iina i latou o loo e aoaoina, e faaaoga soo tusitusiga paia i le taimi o le lesona. Fesoasoani ia latou malamalama o tagata o loo ta'ua i mau o ni tagata moni na oo foi i tiga po o tofotofoga ma latou olioli i a latou taumafaiga e auauna i le Alii. Fai ni fesili e manaomia ai i latou o loo e aoaoina, e su'e tali i tusitusiga paia. Ia uuna'i tagata taitoatasi e suesue i le fale, ma faaali atu ia i latou le ala e lelei ai ona faia lena suesuega. Aoao i latou i le faaaogaina o fesoasoaniga mo suesuega i tusitusiga paia. Ave i ai galuega e su'e ai e tamaiti o le vasega tusitusiga paia ma afioga tulei a perofeta o aso e gata ai.

## **Ia Aoao Atu i le Agaga**

E ao i faiaoga ona saili ia maua le Agaga o le Alii pe a latou aoao atu. E mafai e se tagata ona aoao atu upumoni maoae, ma e mafai foi e tagata o le vasega ona galulue i le faaosofiaina o le naunau i talanoaga, peitai a lē i ai le Agaga, e lē mafai ona malosi se uuna'iga i le loto. A i ai le Agaga, o le a faamalolosia le alolofa o tagata uma i le Tama Faalelagi ma Iesu Keriso, o lo latou fealofani, ma a latou tautinoga e ola i le talalelei. O nisi nei o mea e mafai ona e faia e valaaulia ai le Agaga i le faiga o au aoaoga:

- Ia amata i le tatalo.
- Ia aoao atu mai tusitusiga paia ma afioga tulei a perofeta o aso e gata ai.
- Ia tuuina atu lau molimau.
- Ia fetufaai aafiaga po o mea na oo i ai, ma valaaulia isi e fetufaai mai.
- Faaaoga musika (tagai itulau 10).
- Ia faaali atu lou alofa i le Alii ma isi.

Afai e te saunia lelei oe lava, o le a faa-malamalamaina ma taitaiina oe e le Agaga Paia a o e aoao atu. E mafai ona e mauaina ni lagona e uiga ia i latou o loo e aoaoina, ma mea e ao ona e faa-mamafaina i lau aoaoga. E mafai ona e mauaina manatu ma lagona e uiga i le ala e mafai ai ona e aoao lelei atu. O au taumafaiga filigā o le a faalauteteleina, pe a e usiusitai ma le lotomauualalo i musumusuga po o uuna'iga a le Agaga. O le a mafai foi ona e fesoasoani ia i latou o loo e aoaoina, ia latou iloa le faaaafiaina o i latou e le Agaga.

## Ia Talosia ina ia Aoao ma le Filiga

Ua fetalai mai le Alii, “Inā saili atu ia outou i upu o le potō mai tusi sili ona lelei; ia saili i le aoao, e faapea foi i le suesue ma le faatuatua” (MFF 88:118). E tofu tagata ma le matafaioi ia maua ai se malamalama i le upumoni i ana lava taumafaiga. O le matafaioi a le faiaoga, o le faaosofia lea i isi o le naunau e suesue, malamalama, ma ola ai i le talalelei. Ina ia faataunuuna lenei matafaioi, e mafai ona e tulimata’i atu i mea e tolu:



1. Faaosofia ma faatumau ai le naunau mai o i latou o loo e aoaoina. O le ki i le fai o lenei mea, o lou lava lea nau-nautai e suesue le talalelei. O le isi o lou faaaogaina lea o metotia faafai-aoga e faamanino ai au lesona, ia manaia, ma faigofie ona manatua (tagai itulau 9–12). O le faaosofiaina o le naunau e aupito taua i le amataga o le lesona. Pe a e fuafuaina le faiga o lau aoaoga, vaavaai mo auala e vala-aulia ai le Agaga, ia faaua’i mai tagata uma i se amataga manaia, ma ia tulimata’i atu i le aoaoga po o le mataupu faavae o le a aoaoina i le lesona.
2. Ia uuna’ia le auai i le faatinoga. Fuafua ni auala e faaaui tagata uma i le faatinoina o au lesona. E mafai ona e fai i se tasi e faitau se upusii po o se mau pe faamatala foi se tala. E mafai ona e valaaulia i latou e tali atu i fesili ma tuusaoloto le faatalalanoaina o le lesona. E mafai ona e fai i se tasi pe sili atu foi e usu se pese pe ta se mea fai faaili. E mafai ona e filifilia ma le agaga tatalo se tasi e fai sana molimau pe faamatala sona lava aafiaga patino e faataatai i le autu o le

lesona. O nisi taimi e taua le vave talosagaina o nei tulaga, ina ia mafai ai ona aoao ma faataitai e i latou e te talosagaina, ma latou maua ai le lagona mafanafana e auai.

O le manatu autu lava o se lesona a se tasi o faiaoga o le taua o le faitauina o le Tusi a Mamona. Na ia valaaulia le autalavou i lana vasega e mafaufau i se fuaitau po o se mau ua suia ai o latou olaga. Ona ia valaaulia lea o tagata ofo mai e toatolu pe toafa, e tutu ma faamatala mai a latou mau i le vasega ma faamatala pe na faapefea ona suia o latou olaga e nei mau. A o faamatala mai e tagata taitoatasi o latou lagona matagofie e uiga i le mana o le Tusi a Mamona, sa mauaina e tamaiti o le vasega se faanaunauga moni e faitau ai ma manatunatu loloto i tusitusiga paia i aso taitasi.

E i ai nisi tagata e mumusu e auai. Aua e te fai i ni tagata taitasi e faitau leotele pe tatalo sei vagana ua e mauintoa ua latou maua le lagona to'alelei e fai ai. Afai e i ai lava sou masalosalo i le naunau o se tagata e auai i le faatinoina, fesili mo ni tagata atonu e musu. O le toatele lava o tamaiti aoga e faasolosolo malie lava ona latou aoao ia maua le lagona mafanafana e auai i se faatinoga pe afai latou te vaai o faia ma le ava ma le faaaloalo i latou o loo faatinoina.

3. Fesoasoani ia i latou e faaoga mea ua latou aoaoina. E tatau foi ona e fesoasoani i tamaiti aoga e faaoga mea o loo aoaoina i o latou olaga. E mafai ona aofia ai i lenei mea le

avatu i ai o galuega e fai ma lu'itau e fesoasoani i tamaiti o le vasega ia maua ni aafiaga i upumoni o le aoaoina. Ia manatua e le aoga le aoaoina o le talalelei, sei vagana ua ola ai i le talalelei.

## Ia Faatuina se Atmosifia Faaleaoaga

O le siosiomaga aupito sili mo le aoaoina o le talalelei o se nofoaga lea e manatu mamafa uma i ai tagata i le aoaoina o isi tagata uma o le vaega. E faateleina le naunau e aoao pe a fealofani faiaoga ma tamaiti o le vasega ma fesoasoania'i le tasi i le isi ia mala-malama ma ola ai i le talalelei. Pe a galulue faatasi oe ma i latou e aoaoina, ina ia faatupuina se siosiomaga lelei e aoao ai, o le a itiiti le tula'i mai o ni tulaga e faalavelave ai. E tatau ona e faia mea uma e te mafaia e faatupuina ai sea ituaiga siosiomaga ma fesoasoani ai ia i latou e te aoaoina ia latou iloa ona saofaga atu i ai.

O nisi nei o mea e mafai ona e faia e fesoasoani e faatupuina ai se atmosferia e aoao ai:



- Ia vave taunuu [i le potuaoga] ma mea uma ma masini e tatau ona faa-  
aoga e aoao atu ai.
- Ia mautinoa e matua mama,  
faatulagaina lelei, maua ai le lagona  
mafana, ma leai ni mea e faalavela-  
vea ai.
- Ia amata ma faaii tonu i le taimi.
- Faafeiloai ma faaulufale mai taitoa-  
tasi tamaiti o le vasega, pe a mafai.
- Ia faia mea e valaaulia ai le Agaga  
ma faamalosiaina ai le faaaloalo ma  
le feavata'i.
- Ia alofa i tagata o le vasega ma feso-  
soani ia latou maua le lagona mafana  
e auai i faatinoga.
- Fai ni fesili e fesoasoani i tagata o le  
vasega e tulimata'i atu ai i le mataupu.
- Ia uuna'ia tamaiti o le vasega e faa-  
logo le tasi i le isi ma le faaaloalo ma  
le malamalama.
- Ia puipuia mai ni talanoaga e ono fa-  
atama'ia ai pe faavaivaia ai molimau  
pe aveesea ai foi le Agaga.

Tusa lava pe e te faia uma mea e te  
mafaia e faatupuina ai se atemosifia e  
aoao ai, e mafai lava ona e fetai ai ma

ni luitau. E mafai ona fesoasoani fau-  
tuaga nei e foia ai nisi o luitau ma  
faafitauli masani:

- Afai e tulai mai se faalavelave, aua  
loa nei e toe tautala seia ua'i uma mai  
tagata ia te oe. Ona faaauau ai lea o  
le lesona.
- Afai o talatalanoa ni tamaiti i le taimi  
o le lesona, ia talanoa taitoatasi i ai  
pe a mae'a le vasega ma fesili i ai pe  
o le a se mea e mafai ona e faia faa-  
tasi ma i latou ina ia manuia ai le  
vasega.
- Afai e na o le toatasi se tagata e tali  
i fesili uma, ona tulaia atu lea o  
fesili i isi tagata o le vasega pe fau-  
tuaina ma le agaga faaaloalo e te  
fia manao e faalogo atu i le isi vaega  
e le'i tali mai.
- Afai e fai mai e le vasega ni faamata-  
laga e aveesea ai le talanoaga mai  
le autu o le lesona, ia talia fiafia pea  
ae toe tata'i le talanoaga i le autu o  
le lesona.

O le a faaititia le ulavavale po o ami-  
oga e fai ma faalavelave pe a e sailia ni  
auala mo tagata taitoatasi o le vasega, e  
lagona ai e alofagia ma taliaina ina ia  
auai lelei i le faatinoga.

# Ia Faaoga Metotia Eseese Faafaiaoga

---



E tele mea e mafai ona e faia e faama-naia ai le tuuina atu o au lesona ma fesoasoani ai i tagata o le vasega e aoa-ina upu moni o le talalelei. O nisi nei o fautuaga:

## Ia Faaoga Tala ma Faataitaiga

O tala ma faataitaiga e fa'aala ma faatumauina ai le fiafia o tagata, ma faapupula ai le tulaga e faaoga ai mataupu faavae o le talalelei i olaga i aso taitasi.

E te mauaina tala lelei atoatoa i tusitu-siga paia ma lau tusi lesona a le faiaoga. A o le'i faia lau lesona, ia suesue i tala taitasi ua e fuafua e faaoga. Ia faataitai muamua lou faamatalaina atu e faaoga ai au lava upu. O le a faalogologo lelei lau vasega pe a e faamatalaina le tala i

au lava upu, nai lo le faitauina. E le gata i lea, e fiafia foi tamaiti laiti e faatino ia tala.

E masani ona amata le lesona a se tasi faiaoga o le Peraimeri i se tala mai tusi-tusiga paia. Mo se faataitaiga, afai o lana lesona e faatatau i le agalelei, na te faamatalaina le tala i le Samaria agalelei. E mafai ona vaai faalemafau-fau tamaiti i le tagata na fasia ma tagata foi na faateletelevave ese e aunoa ma se fesoasoani atu i ai. Sa fiafia i latou i le agalelei ma le tamalii o le tagata Samaria, o lē na alofa i le tagata manu'a. E sagisagi atu lava tamaiti i nei tala. Sa aoa e le faiaoga ia iloa ona faaoga lona leo ma foliga e faatumauina ai le ua'i mai o tamaiti o le vasega. Na oo ina masani atili tamaiti ma sagisagi fiafia i tusitusiga paia.

## Faaoga Ata ma Mea Faitino

Sa faaaogaina soo e le Faaola mea faitino faigofie pe a Ia aoao atu. Na Ia faaaogaina le saitō, oneone, papa, ma isi mea masani e fesoasoani ai i tagata ia malamalama i mea na Ia aoaoina mai. Mo se faaitaiga, na Ia faatusaina le malo o le Atua i se 'oa e matua sili na'ua, o le a faatauina atu ai e se tasi mea uma ua ia te ia ina ia ona mauaina ai (tagai Mataio 13:44).



Vaavaai solo i ou autafa. O a ni mea faatauva e mafai ona e faaaogaina e fesoasoani atili ai ia malamalama le vasega i mataupu faavae o le talalelei?

Atonu e te manao e faaoga ni ata tusi faigofie ma ni ata e faapupula ai mataupu faavae o le talalelei. Faaali se ata mai le Taga Ata o le Talalelei pe a e faamatalaina se tala faatusi paia. Tusi se ata faigofie i le laupapa po o se fasipepa e faamanaia atili ai le tala.

Sa tuuina atu e se tasi faiaoga se lesona e faavae i le faataoto a Iesu i le saitō ma le titania. E nonofo tamaiti o le vasega i vaega e i ai faatoaga, ma sa iloaina e le faiaoga o le a malamalama i latou e

mafai ona faatama'iaina saitō laiti pe a vave velese vao. Sa ia saunia se tama'i afifi o 'au o saitō e faafefiloi ma vao. Na ia faaalua leni afifi i le lesona atoa.

Na uuna'ia e se tasi faiaoga tagata o le vasega e mafau fau i se mea e mafai ona latou faatusa i ai le salamo. Na fautua ina e se tasi o le vasega o le salamo e pei o se fasimoli, aua e mafai ona faamamaina ai i tatou mai a tatou agasala.

## Faaoga Musika

O musika o se auala lelei tele e valaaulia ai le Agaga o le Alii i a tatou lesona. E fesoasoani musika e faailoa atu ai o tatou lagona atonu e faigata ona faaali atu i ni upu.



O loo aoao mai i viiga a le Ekalesia le tele o mataupu faavae o le talalelei ma e toetoe o lesona uma e mafai ona faaaogaina ai. E mafai ona e valaauliaina se tagata se toatasi, o se vaega o tagata, po o le aiga atoa i le vasega e usu se viiga e fetauti ma le lesona. E mafai foi ona e faitauina leotele upu o se viiga a o tatina e se isi le piano. E mafai foi ona e taina se viiga ua pu'e i se lipine.

Sa saunia e se tasi faiaoga se lesona e uiga i le auauna atu. Na ia filifilia se viiga e lagolagoina ai le manatu autu. I le faagasologa o le lesona, na ia valaulia ai se tuafafine e faitau upu o lenei viiga a o hamu lemuina e se isi le fati. Sa ia faatonuina le vasega e manatunatu loloto filemu i upu a o faitauina. Na fesoasoani lenei musika i tagata o le vasega e malosai ai o latou lagona i le taua o le auauna atu.

## Ia Fai Fesili e Mafaufau Toto'a Ai ma Faatupuina ai le Talanoaga



O le faia o fesili sa'ou, o le a uuna'ia ai le aoaoina lelei ma talanoaga i lau vasega. E tele ala e fesoasoani ai fesili ma talanoaga. E fesoasoani i tagata o le vasega e ua'i mai ai i le lesona. E mafai ona e iloa ai pe o malamalama le vasega i le lesona. E mafai e tamaiti o le vasega ona a'oa'o e le tasi le isi pe a latou tali mai i fesili ma talanoaina le fesili. E mafai ona latou aoao pe faapefea ona faaoga mataupu faavae i o latou lava olaga.

A o e saunia au lesona, filifili pe o a fesili e te faia. E mafai ona fesoasoani fautuaga nei ia te oe.

- Fai fesili e fesoasoani i le vasega e mafaufau ai e uiga i le mataupu faavae o le talalelei ma pe faapefea ona faaoga i o latou olaga. O fesili e faa-ala ai mafaufau e masani ona amata i le "aisea" po o le "pe faapefea?" E tataua ona e aloese mai fesili e mafai ona taliina i le "ioe" po o le "leai" po o tali e taitasi upu.

Mo se faaitaiga, o le aoaoina o se lesona e uiga i le faaautu o o tatou olaga i le Faaola, e mafai ona e faia fesili e pei o nei:

"O le a le uiga o le fausia i luga o le papa o Keriso?"

"O a faavae e ese mai lo le papa o Keriso e fausia ai e tagata o latou olaga i nisi taimi?"

"E faamanuiaina faapefea oe pe a e fausia lou ola i luga o le papa o Keriso?"

- Fai fesili e uuna'ia ai tagata o le vasega e fetufaai manatu ma aafiaga o le tagata lava ia. Mo se faaitaiga:

"Aisea ua poloaiina ai i tatou e le Alii ina ia tatalo e le aunoa?"

"Na faapefea ona tali mai o Ia i au tatalo?"

- Fai fesili e fesoasoani ai i tagata o le vasega e faaoga mataupu faavae o le talalelei i o latou olaga. Mo se faaitaiga:

"E mafai faapefea ona saunia lelei i tatou lava mo le mauaina o tali i a tatou tatalo?"

"E mafai faapefea ona e iloa o Iesu Keriso o le Faaola o le lalolagi?"

“E mafai faapefea ona faamalosi lau molimau o Iosefa Samita o se perofeta a le Atua?”

Pe a fai atu e se tasi se fesili ia te oe ae le mafai ona e taliina, fai i le vasega e fesoasoani atu ia te oe mo le taliina, pe e te fai foi i le tagata o le a e taliina i le isi vasega.

Aua e te popole pe a leai se tamaitiiti e tautala mo ni nai sekone pe a uma ona e fesili atu i ai. E masani ona latou manaomia se taimi e mafaufau ai i tali. Peitai, afai e foliga mai e le malamalama i le fesili, atonu e tatau ona e toe faaupuina. Pe a fai atu se fesili i se tasi, e fesoasoani lou ta’ua muamua o lona igoa ona faatoa fai ai lea o le fesili.

A uma, ia e faaeteete aua nei vave faamotuina se talanoaga lelei ona o lou taumafai e faauma ni mea sa e saunia mo le lesona. O le mea e aupito taua, o le mauaina lea e tagata o le uunā’iga a le Agaga, faateleina lo latou malamalama i le talalelei, iloa faaoga mataupu faavae o le talalelei i o latou olaga, ma faamalosi a latou tautinoga e ola ai i le talalelei.

## **Valaaulia Malo Faapitoa**

Atonu e te manao mai lea taimi i lea taimi e valaaulia se malo faapitoa e sau

i lau vasega. E mafai ona e talosagaina se tagata agavaa o le Ekalesia e tuuina mai se lipoti, faamatala se tala, pe fai sana molimau. Ia vave ta’u i ai i lea tagata pe o le a le tele o le taimi na te faaaogaina. Ia maua mai se faatagana mai lou epikopo po o le peresitene o le paranesi a o le’i valaauliaina se tagata e nofo i fafo atu o la outou uarota po o le paranesi.

Na valaaulia e se tasi peresitene o le korama a le au toeaina se tagata o le ekalesia e sau e faamatala i toeaina auala e faamanaia ai ia savali o asiasiga i aiga mo tamaiti latou te asia. E le gata ina maua e le au toeaina se malamalamaaga fou e tatau ai ona auai tamaiti i asiasiga i aiga, ae na latou mauaina ai foi le tele o fautuaga i auala e fesoasoani i le faaauai o tamaiti.


## **Faaoga Gaoioiga**

E mafai ona fesoasoani nai gaoioiga faigofie e faatatau i le lesona, i le vasega, aemaise lava o tamaiti laiti ma le autalavou, latou te aoaoina ai mataupu faavae o le talalelei. O ia gaoioiga e tatau ona talafeagai mo le aoaoina o le talalelei. O le tele o tusi lesona e gaoisia e le Ekalesia, o loo aofia ai fautuaga mo gaoioiga.



# Ia Saunia Lau Lesona

---



E taua le saunia ma le faaeteete o lesona e te aoaoina atu, ina ia mafai ai ona lelei lou tuuina atu o mataupu faavae. O le a fesoasoani nei fautuaga ia te oe ina ia saunia.

- O mea faitino e aoao ai mau, i la outou gagana
- O se seti ata e ta'ua o le Pusa o Ata o le Talalelei, e tatau ona i ai i le potutusi o lo outou falelotu

## Ia Iloa Risosi

Ua saunia ma le faaeteete e le Ekalesia mataupu e aoaoina ma tusi e faavae i luga o tusitusiga paia ma aooga a perofeta o aso e gata ai. Fesili i le taitai perisitua po o le ausilali pe o maua nei risosi:

- O se tusi a le faiaoga e lomina e le Ekalesia mo lau vasega
- O tusitusiga paia mo le vasega
- O mekasini a le Ekalesia o loo i ai aooga a perofeta o aso e gata ai



Matamata i mea o loo maua ina ia mafai ai ona e fuafua pe faapefea ona faaaoga i au lesona. E te le tau manaomia ni mea tetele faapea ina ia lelei ai oe le faiaoga. E tele lesona na aoao mai e Keriso i ni siosiomaga maualalo. O le aafiaga aupito taua i lou aoao atu, o le Agaga lea. O le faaaogaina lelei o risosi faafaiaoga faatasi ai ma le taitaiga a le Agaga, e maua ai tomai aupito sili mo le aoaoina o le talalelei.

## Ia Vave Sauniuni

Ia vave sauniuni au lesona. E masani ona fesoasoani le amata suesue i lesona i ni nai vaiaso a o lumana'i le taimi e aoao atu ai. E mafai ai i lea tulaga ona e mafaufau ma tatalo e uiga i autu o le lesona ma saunia lelei ai.

## Ia Tulimata'i Atu i le Faamoemoega o le Lesona

E tatau ona i ai se faamoemoega o lesona taitasi uma e te aoao atu. Mo se faataitaiga, o le faamoemoega o se lesona i le anapogi, e mafai ona faapea e fesoasoani ai i tamaiti o le vasega ia malamalama i faamanuiaga o le anapogi po o le taua o le anapogi mo se faamoemoega patino i Aso Sa anapogi. O le faatinoina o le lesona ma le talanogaga e tatau ona tulimata'i atu i le faamoemoe.

Ina ia filifilia se faamoemoega o se lesona, suesue i le lesona ma mau o loo avatu faatasi ai. Fesili atu i le Alii e fesoasoani ia e malamalama i savali aupito taua mai lenei lesona mo tagata o le vasega o loo e aoaoina. Fesili ifo ia te oe lava, "Mata o le a le mea o le a tupu i

olaga o i latou o loo e aoaoina ona o lenei lesona?" O le tele o lesona i tusi lesona o loo gaosia e le Ekalesia, o loo aofia ai ma faaupuga o faamoemoega. E mafai ona fesoasoani nei faaupuga ia te oe e te filifili ai pe faapefea ona uuna'ia e lesona taitasi i latou o loo e aoaoina.

## Filifili Pe o A Mea e Aoao Atu

A mae'a ona e fuafuaina le faamoemoega o se lesona, ona filifili lea pe o a mataupu faavae e tatau ona aoaoina atu ina ia ausia ai lena faamoemoega. O le tele o tusi lesona e aofia ai mau, o tala, ma isi faamatalaga e fesoasoani ai ia te oe mo le aoaoina atu o le lesona. Peitai, o le tele lava o lesona e tele na'uā, e le mafai ona e aoao uma atu i le taimi faatulagaina. O ia tulaga faapea, e tatau ai ona e filifili i mea e aupito sili ona fesoasoani mo i latou e te aoaoina. Fesili ifo ia te oe lava, "O fea aoaoga ma mataupu faavae o i lesona o le a fesoasoani i tagata o le vasega e faafetaia'ia ai lu'itau o loo latou feagai i le taimi nei?"

Afai e te manaomia ni mea e lē o i ai i le tusi lesona po o tusitusiga paia, ona faaaoga lea o tala ma saunoaga mai Savali a le Au Peresitene Sili, o Savali a Faiaoga Asiasi, ma mekasini a le Ekalesia, aemaise lava o savali o le konafesi aoao.

A o e filifili pe o a mea e aoao atu:

- Ia suesue ma le agaga tatalo mea o loo i le lesona.
- Ia faia se lisi o aoaoga ma mataupu faavae autu o loo i ai i le lesona.

- Ia teu pea lava pea i lou mafaufau mea e manaomia ma tulaga e i ai i latou o loo e aoaoina.
- Ia mulimuli i le taitaiga a le Agaga.

E masani ona sili le taula’i atu i se mataupu faavae se tasi pe lua foi.

## Filifili pe Faapefea ona Aoa Atu

A mae’a ona e filifili i le mea e aoa atu, e tatau loa ona e filifili pe faapefea ona aoaoina. Ia suesue i ai ma tatalo ma manatunatu loloto i auala aupito sili e tuuina atu ai mea e te aoaoina. O metotia e te faaaogaina e tatau ona fesoasoani ai i le vasega ia malamalama ma faaoga mea o loo e aoaoina atu.

Ia suesue ma le faaeteete i mau, o tala, ma isi faamatalaga o loo talanoaina i le lesona ma nisi lava mau o le a fesoasoani ia te oe mo le aoaoina atu o le aooga faavae po o le mataupu faavae. Ia saunia e fesoasoani i tagata o le vasega ia malamalama i le ala e faaoga ai mau i o latou olaga (tagai 1 Nifae 19:23).

Ia mafaufau foi e faaoga tala ma faaitaiga mai lou lava olaga ma olaga o lau vasega. Mo se faaitaiga, sa i ai se alii talavou na lē toe ulaula ina ua mae’a se lesona i le Upu o le Poto lea na faamalalamaina ai e le faiaoga mea na oo i ai lona uso i le faatoilaloina o lenei mausa. Na faaalua i lenei faaitaiga e mafai e se tagata ulaula ona suia

ona mausa po o amio masani. Ina ua faalogo lea tagata o le vasega i lenei tala, sa naunau o ia e mafai foi ona suia e ia lona lava olaga.

Mo faamatalaga e uiga i metotia e fesoasoani ia te oe e tuuina atu ai le lesona, tagai i itulau e 9–12 o lenei taiala.

## Fuafua se Faaiuga

E masani ona aotele e le Faaola mea na Ia aoaoina atu ma uuna’ia tagata e faaoga i o latou olaga (tagai i le faataoto i le Samaria agalelei, Luka 10:30–37). I le faaiuga o se lesona, e tatau ona e toe faamanatu ma aotele mea sa e aoaoina atu. Ia fautuaina atu mo le vasega ni auala e faaoga ai aoaoga po o mataupu faavae o le talalelei, ma fesili atu foi ia i latou mo nisi auala. Ia uuna’ia i latou e faaoga se tasi o nei manatu i le vaiaso a sau. I lesona mulimuli ane, atonu e te manao e fesiligia i latou pe o a ni mea ua latou aoaoina mai a latou taumafaiga.

Sa valaaulia tagata o le vasega a se tasi faiaoga e latou te faia se galuega auauna atu e aunoa ma le iloa e se isi, i aso taitasi o le vaiaso atoa. I le amataga o le isi vasega, na fesili ai le faiaoga mo se lipoti puupuu. Na faamatalaina ma le fiafia e le toatele o le vasega a latou mea na fai ma le olioli na latou lagonaina ina ua latou faatinoina lenei lesona. O le tali leleia e nei tagata o le vasega, na faaosofia ai le manao o isi latou te faia ni a latou lava auaunaga e sili atu.

# Ia Malamalama i Tagata o Loo E Aoaoina

---



E taua le malamalama ia i latou e te aoaoina. Manatu i le matutua ma le malamalama o tagata o lau vasega. O tagata i vaitausaga eseese, e eseese foi mea latou te manaomia ma eseese foi auala latou te aoao ai.

## Tamaiti

O loo tuputupu a'e tamaiti i le faaletino, faale-vafealoai, faale-lagona, ma le faaleagaga. A o e saunia lau lesona, ia manatua taleni a tamaiti taitoatasi, o o latou tomai, ma mea e manaomia.

E fiala lava tamaiti i le felanulanua'i. Ia faaaoga tala pupuu, o nai taaloga faigo-fie, o ata, o lesona e faaaoga ai mea faitino e faapupula ai se manatu, ma pese e faatumau ai lo latou fiala mai.

Na pau lava le mea o loo faia e tamaiti o le aoaoina o le fetufaa'i, agalelei, ma

le onosai. Fesoasoani ia latou faatoilaloina o latou vaivaiga i nei eria e ala i le faamanatu atu pea ia te i latou o le faaitaiga a Iesu ma faamalosiau ia te i latou e mulimuli ia te Ia.

E faatuatuaina [oe] e tamaiti ma e talitonu gofie foi. O le a latou talitonu i mea e te aoao atu. O le a latou maitauina foi ma mulimuli i au faaitaiga.

## Talavou

O le vaitaimi i le va o le olaga faatamaitiiti ma le faatagata matua, e faigata lava ma lu'itauina i nisi o taimi. Atonu e tele tiutetautave o tagata o le vasega i o latou aiga, o le aoga, ma le galuega. E mafai ona fesoasoani fautuaga nei ia te oe e faatosina ai le tupulaga talavou mo le lelei.



Ia saunia lesona taitasi ina ia talafeagai lelei lava ma o latou olaga. Fesoasoani ia latou iloa le ala e mafai ai e le talalelei ona tali a latou fesili ma fesoasoani latou te faia ai filifiliga lelei.

Atonu e i ai i le au talavou ni lagona faaesea pe lē amana'iaina foi. Ia fesoasoani i tagata ia avea o se vaega taua o lau vasega. O le avea ma se tasi o se vaega e i ai tulaga faaletalalelei, e maua ai e le tupulaga talavou le malosi faaleagaga ma fesoasoani ia i latou e tausia mama ai o latou olaga.

Ia faaali atu e te faaaloalo i o latou manatu. Ia faamalosiua ia te i latou e auai i le faatinoina o le lesona ma ia talanoaina faatasi ma oe ma isi o latou manatu.

## Tagata Matutua

O vasega mo tagata matutua e eseese tausaga ma eseese mea e o mai ai ma aafiaga. Ia faaaoga nei eseese e faamauoa ai lau vasega. Ia uuna'ia tagata o le vasega e fetufaai mai le poto ua latou aoaoina mai o latou aafiaga po o mea na latou oo i ai. Ia faaaoga a latou taleni e tele.

Ia faafaigofie le aoaoina atu i ai o upumoni o le talalelei. O le a fesoasoani le Agaga Paia i tagata o le vasega ia malamalama ma faaaoga upumoni i o latou olaga taitoatasi.

# Tauī o le Aoaō Atu

---



I le avea ai ma se faiaoga, e mafai ona e iloa le olioli e maua mai le fesoasoani atu i isi ina ia tuputupu a'e lo latou malamalama i le talalelei. O au taumafaiga maelega ma le faamaoni o le a fesoasoani i isi e atina'e ai ni molimau malolosi atu e uiga i le Faaola ma ola ai i poloaiga.

Sa popole se faiaoga o le Aoga Sa ona e toatele atu isi sa i ai i le vasega, e sili atu le agavaa e faiaoga nai lo ia. Na ia taumanatunatu pe na i ai se aafiaga lelei i lana aoaoga. Ona oo lea i se tasi Aso Sa, sa ave ai e se tasi o le vasega le faiaoga ma talanoa atu i ai. Na ia fai mai, talu ai le Agaga o le vasega na lagonaina e lona toalua, o lea ua fai ai lana tautinoga e faapotopoto faatasi lona aiga e tatalo faaleaiga i aso taitasi. Ua ta'utino foi e ia o le a sauni e alu i le malumalu e faamau ai lona aiga.

Sa faaalua e lea tagata o le vasega lona alofa ma lona agaga talisapaia loloto mo taumafaiga uma na faia e le faiaoga ina ia valaaulia ai le Agaga i totonu o la latou vasega. Ona tumu ai lea o le loto o le faiaoga i le lotomauualalo, ma sa ia malamalama i le faamoemoega moni ma le tauī o le aoaō atu.

Pe a e aoaō atu, o le a faamanuiaina oe faatasi ai ma tagata o lau vasega. O le a faamalosi lou lava malamalama o le talalelei ma lau molimau i le Faaola a o e suesue, sauniuni, ma aoaō atu lesone o le talalelei. O le a e lagonaina le faateleina o lou alofa mo isi. O le a e lagonaina le saga liligi mai o le Agaga i lou lava olaga a o e taumafai ma le maelega ma le lotomauualalo e ola ai i mea o loo e aoaoina atu. O le a faamauoaina lou olaga i lau tautua po o lau auaunaga o se faiaoga.

# Taulimaina o le Faaleleia Atili o Faiaoga i le Paranesi

---



O le au peresitene o le paranesi e gafa ma le tulaga maualuga faafaioga i totonu o le paranesi.

## O Tiutetauave o le Faatonu mo le Faaleleia Atili o Faiaoga

Pe a faatoateleina le aofai o tagata auai o le paranesi, e tofia e se tasi o le au peresitene o le paranesi se faatonu mo le faaleleia atili o faiaoga, ma faamanuia [lena tagata] i le tofiga, na te vaaia le faaleleia atili o faiaoga. E mafai ona tofi se alii po o se tamaitai. O ia o se tasi o le aufono a le paranesi, ma e galue o ia o se risosi i taitai o le perisitua ma ausilali i a latou taumafaiga e faaleleia atili le aoaoina atu o le talalelei. E fesoasoani le faatonu i taitai i le fuafuaina ma le taitaiina o fonotaga mo le faaleleia atili

o faiaoga, ma afai foi e tofia, ona ia faia lea o le vasega o le Aoaoina Atu o le Talalelei.

## Lagolagoina o Faiaoga e Taitai

Ua i ai i taitai o le perisitua ma ausilali le tiutetauave mo le tulaga maualuga o le lelei o le aoaoina atu o le talalelei i a latou faalapopotoga. E tatau ona avea i latou ma faaitaiga maualuga o le aoaoina atu ma fesoasoani i faiaoga ia malamalama i le taua o o latou vala-auga. Latou te tuuina atu le agaga faafetai, fesoasoani, ma le faamalosiua i faiaoga o loo latou vaaia. O le a faaleleia atili le maualuga o le tulaga faafaioga i le Ekalesia, pe a tuuina atu e taitai la latou lagolagosua ma le lotolofa ma le faamalosiuga i faiaoga i a latou faalapopotoga.

## Fonotaga mo le Faaleleia Atili o Faiaoga

E tatau i taitai taitasi o le perisitua ma ausilali ona auai atu i se fonotaga mo le faaleleia atili o faiaoga lea e taitolu masina ma fai, ina ia aoao ai mataupu faavae, o metotia, ma tomai e faaleleia atili ai le aooina atu ma le aooina mai o le talalelei. O le faatonu mo le faaleleia atili o faiaoga e taulamua i le faakalenaina ma le fuafuaina o fonotaga mo le faaleleia atili o faiaoga ma feutagai ma taitai o le perisitua ma ausilali. E tatau ona faia ia fonotaga i taimi e faigofie mo faiaoga ma taitai ma e le tatau ona feteenai ma le faasologa o fonotaga ma sauniga masani o le Aso Sa. O le mea masani lava, e le tatau ona sili atu ma le itula e tasi lea fonotaga.

E mafai ona aofia i le fonotaga mo le faaleleia atili o faiaoga mea nei:

- O se savali puupuu mai se sui o le au peresitene o le paranesi po o se taitai o le perisitua po o ausilali e uiga i se mataupu faavae o le aooina atu po o le aooina mai.
- Se aoaoga po o se faatinoga o se metotia faafiaoga po o se tomai e saunia e se taitai o le perisitua po o se ausilali po o se faiaoga foi.
- Taimi e fetufaai ai manatu o faiaoga ma taitai ma talanoaina auala e fesoasoani ai i ni tagata patino o le vasega.

Pe a faatoateleina le numera o faiaoga ma taitai i totonu o le paranesi, e mafai ona faia se fonotaga se tasi mo le faaleleia atili o faiaoga i kuata taitasi mo:

- Faiaoga ma taitai o tagata o le paranesi ua tai 18 tausaga ma sili atu.
- Faiaoga ma taitai o tagata o le paranesi ua tai 12 tausaga e oo atu i le 17.
- Faiaoga ma taitai o le Peraimeri.

E mafai ona faatulaga nei fonotaga ina ia tofu le masina ma le fonotaga.

## Vasega O Le Aooina Atu o le Talalelei

O le vasega o le Aooina Atu o le Talalelei o loo i ai se faavae e fesoasoani ai i tagata ina ia avea ma faiaoga sili atu o le talalelei i o latou aiga ma fonotaga po o sauniga faale-Ekalesia. O loo i ai se oototoga o le vasega lea i itulau e 21–22 o lenei tusitaiala. O le faatonu mo le faaleleia atili o faiaoga e faia le vasega lea sei vagana ua tofia e le au peresitene o le paranesi se isi tagata o le paranesi e faiaoga ai.

E valaaulia e le au peresitene o le paranesi tagata o le paranesi e aveina le vasega lea. O le mea masani lava, e le sili atu ma le 10 tagata o le vasega i taimi taitasi, ina ia mafai ai ona auai atoatoa tagata taitoatasi.



# Otootoga mo le Vasega o le Aoaoina Atu o le Talalelei

---

O Vasega o le Aoaoina Atu o le Talalelei, e saunia ai se avanoa mo tagata uma o le Ekalesia ia aoao ai pe faapefea ona avea ma faiaoga e sili atu. O le faiaoga o le vasega, o le faatonu o le faaleleia o faiaoga po o se isi faiaoga ua i ai le potomanasani, e valaauina e le peresitene o le paranesi. E mafai ona aoaoina lenei vasega i le taimi o le Aoga Sa po o se isi taimi faigofie. Afai o loo faia le vasega mo taitai ma faiaoga mai se faalapopotoga patino, e mafai foi ona aoaoina o se vaega o le latou fonotaga masani faale-autaitai. O nofoaga e faigata ai ona o le mamao o mea e malaga mai ai pe leai foi se avanoa o fale i le taimi o Aoga Sa, e mafai ona fai se fuafuaga tuufaatasi o suesuega e faia i le aiga ma ni nai vasega (e tofu faia ai ni lesona eseese).

O loo saunia atu i lenei tusitaiala manatu mo lesona taitasi. A o saunia e le faiaoga se lesona, e tatau ona ia faaogaina fautuaga i le vaega ua faaulutalaina “Ia Faaoga Metotia Eseese Faafaiaoga.” I le faaiuga o lesona taitasi, e tatau i le faiaoga ona uuna’ia tagata o le vasega e faaogaina mea ua latou aoaoina i lena aso, i se vasega i le Lotu po o se afiafi faaleaiga. O le a matua faalauteleina ai lo latou atina’eina i le avea ai ma faiaoga. Sei vagana pe afai e ta’u atu, e tatau ona aoaoina le vasega po o le kosi i le umi e valu vaiaso e tusa ai ma le faatulagana o taimi o loo ta’ua i lalo. O fautuaga o loo tuuina atu i lalo, e mo le faiaoga o le vasega.

## Vaiaso 1

Tuu atu i tagata taitoatasi o le vasega se kopi o lenei tusitaiala, ma iloilo ona mataupu. Ia tulimatai atu le lesona i le

faatomuaga ma le vaega ua faaulutalaina “Ia Saunia Oe Lava Faaleagaga.” Ia faamamafa le taua o le faamanuiaina i se tofiga, ma ola ai i le talalelei ina ia agavaa e maua le Agaga.

## Vaiaso 2

Tulimatai atu i le “Ia E Alofa i Tagata o Loo E Aoaoina,” o loo maua i le vaega ua faaulutalaina “Ia Aoaoina Atu E Faapei Ona Aoaoina Atu Iesu.” Ia faasino foi i tulaga o vaitausaga i itulau e 16–17 o lenei tusitaiala. Fai i tagata o le vasega e faamatala mai ni mea lelei na latou oo i ai, talu ai lo latou malamalama ma le aapa atu i tagata o aiga po o tagata o le vasega. Atonu e te manao foi e talanoaina pe faapefea ona aapa atu faiaoga e faafaileleina tagata taitasi e tusa ai ma mea latou te manaomia, aemaise lava o tagata faatoa liliu mai, ma tagata e i ai tulaga faaletonu o le tino po o le mafaufau.

## Vaiaso 3

Ia tulimatai atu i le “Aoaoina Atu Upumoni o le Talalelei,” o loo maua i le vaega ua faaulutalaina “Ia Aoaoina Atu E Faapei Ona Aoaoina Atu Iesu.” Ia faamamafa le taua ma le faamaoni o aoaoga faavae, ma i se tulaga faigofie, le faaogaina o tusitusiga paia i le faiga o aoaoga, ma atina’e se fuafuaga mo le aoaoina o le talalelei e le tagata lava ia.

## Vaiaso 4

Ia tulimatai atu i le “Ia Aoaoina Atu i le Agaga,” o loo maua i le vaega ua faaulutalaina “Ia Aoaoina Atu e Faapei Ona Aoaoina Atu Iesu.” Fesoasoani i tagata o le vasega ia latou maua le lagona e

mafa'i ona latou agavaa mo le mauaina o le Agaga i a latou aoaoga. Fesoasoani ia latou aoa'o ia iloa le Agaga ma muli-muli ai.

## Vaiaso 5

Tulimatai atu i le "Ia Talosia ia Aoa'o ma le Filiga," o loo maua i le vaega ua faaulutalaina "Ia Aoa'o Atu e Faapei Ona Aoa'o Atu Iesu." Ia faamamafa auala patino e mafai e le faiaoga ona fesoasoani ai ia i latou o loo latou aoaoina ina ia taliaina a latou matafaioi e aoaoina le talalelei ma ola ai i le atoatoa.

## Vaiaso 6

Tulimatai atu i le "Ia Faatuina se Atmosifia Faaleaoaoga," o loo maua i le vaega ua faaulutalaina "Ia Aoa'o Atu e Faapei Ona Aoa'o Atu Iesu." Fesoasoani i tagata o le vasega ia malamalama i auala e faatuina ai se atmosferifia e mafai ai e tagata uma ona auai i le faatinoina ma mananao e aoa'o.

## Vaiaso 7

Tulimatai atu i le vaega ua faaulutalaina "Ia Faaoga Metotia Eeseese Faafaiaoga." O le fatufatua'i o se lesone lelei e manaomia ai le mafaufau ma le faifai mea fou, ma e mafai ona fesoasoani tele mea o loo i ai i leni vaega. Fai i tagata o le vasega e faata'ita'i pe faamatala mai ni mea na latou oo i ai i le faaogaina o metotia faafaiaoga o loo talanoaina i leni vaega.

## Vaiaso 8

Tulimatai atu i le vaega ua faaulutalaina "Ia Saunia Lau Lesone." Fesoasoani i tagata o le vasega ia malamalama i le taua o le vave saunia o lesone, ma talanoaina pe faapefea ona fuafua ma tuuina atu ni lesone lelei.

I ni taimi talafeagai o le vasega po o le kosi, atonu e te manao e faamamafa elemene i le vaega ua faaulutalaina o le "Tui o le Aoa'o Atu." Fai i tagata o le vasega e fetuفاai ni auala ua faamanuaina ai e faiaoga o latou olaga ma auala ua mafai ai ona fesoasoani atu i latou o ni faiaoga i isi.

A mae'a le vasega po o le kosi, ia uuna'ia tagata na auai e faaauau pea le faaleleia atili i le aveai ai ma ni faiaoga. Afai e fou le valaauina o i latou e fai ma faiaoga i le potuaoga, e ao i lo latou taitai perisitua po o le ausilali ona latou fonofono ma tuu atu ia i latou se faamaninoga puupuu o le vasega ma tagata e i ai. A mae'a lena, e tatau ona latou lipoti atu mai lea taimi i lea taimi lo latou alualu i luma ma talanoaina ma o latou taitai perisitua po o ausilali ni manaoga patino ma luitau. E mafai ona latou valaaulia e asiasi atu i le latou vasega ma fesoasoani ia i latou i soo se mea. O le faatonu mo le faaleleia atili o faiaoga o se sosia faifai pea lea o fesoasoaniga mo faiaoga uma-o i latou ua valaauina e faiaoga i le potuaoga ma i latou e faia'oaoga i o latou aiga ma tiutetauave faale-autaitai.

# O Le Mauaina mai o Tusi ma Isi mea mo Aoaoga Faale-Ekalesia ma le Sailia o Faamatalaga e Uiga i le Talafaasolopito Faaleaiga

---

E mafai e taitai ma isi tagata o le paranesi ona maua mai tusi ma isi mea mo aoaoga faale-Ekalesia, e aofia ai tusitusiga paia, o kosi po o vasega e aoaoina, o mekasini faale-Ekalesia, ofusa, ma laei o le malumalu, mai lo latou faletusi tutotonu i lo latou atunuu, po o le Faletusi Autu o le Ekalesia i Sate Leki,

po o le tuatusi faava-o-malo o le Ekalesia i le Initoneti, i le [www.lds.org](http://www.lds.org).

O faamatalaga e uiga i le galuega mo talafaasolopito o aiga po o gafa o loo maua lea i le tuatusi faava-o-malo a le Ekalesia mo talafaasolopito faaleaiga i le Initoneti, i le [www.familysearch.org](http://www.familysearch.org).

○ LE EKALESIA A  
**IESU KERISO**  
○ LE AU PAIA ○ ASO  
E GATA AI

SAMOAN



34595 890